



Griffie ER Bonaire	
Ingek.:	JUN 22 2015
Volgnummer:	2015006036
Griffier:	Uitv.:

Frakshon di Movementu di Pueblo Boneriano

KOLEGIO EHEKUTIVO DI ENTIDAT PÚBLIKO BONEIRU

At: Sr Clark Abraham, diputado di Struktura Estatal
Plaza Wilhelmina 1
Boneiru

Boneiru, 22-6-2015

Tópiko: Preguntanan por eskrito na Kolegio Ehekutivo di Boneiru konforme artíkulo 45 di Reglamentu di òrdu pa Konseho Insular di Boneiru

Apresiabel sr Abraham,

Riba djabièrnè 19 di Yüni 2015 e lidernan di frakshon di Partido Demokrátiko Boneriano i Union Patriótiko Boneriano, sr Robby Beukenboom i sr James Kroon, a firma un deklarashon huntu ku e kabesante di e grupo di interes Nos Ke Boneiru Bèk, sr James Finies. Den e deklarashon aki e dos lidernan di frakshon mensioná ta afirmá ku lo bini un referèndem na Boneiru riba un òf otro fecha den e lunanan ku a resta den 2015, de fakto e aña ku nos ta aden aki. E deklarashon no ta hasi mension di un fecha fiho. E akuerdo di gobernashon entre PDB i UPB tambe ta hasi mension di un referèndem den 2015 i na diferente okashon, despues di a asumí responsabilidat gubernamental, representantenan di e koalishon PDB – UPB a ripití e ponensia aki den medionan di komunikashon. Ademas frakshon di MPB ke muestra riba un diskrepansia signikativo, teniendo kuenta ku NKBB a lucha pa un referèndem di outodeterminashon i e koalishon di PDB i UPB ke bai organisá un referèndem di konsulta tokante Struktura Estatal.

Kalkulando ophetivamente nos ta konkluí ku e tempu ku a sobra pa preparashon general di e referèndem ta maksimalmente seis (6) luna. E término di preparashon, mirando ku na e momentunan aki no a dal ningun paso ainda den direkshon di preparashon i organisashon di e instrumento di konsulta di pueblo di mas importante ku ta eksistí, ku ta un referèndem, ta kòrtiku, pa no bisa muchu kòrtiku. Serka nos komo miembronan di frakshon di Movimiento di Pueblo Boneriano esaki ta krea máksimo preokupashon mirando ku Gobièrno di Boneiru ta enkargá su mes ku un tarea ku probabelmente e no por kumpli kuné. Seriamente nos ta avertí pueblo di Boneiru pa e peliger ku e ta bai konfrontá pa motibu ku no tin ningun klase di garantia ku pueblo lo por haña suficiente informashon pa por forma un opinion tokante e diferente opshonnan ku ta ser presentá na dje, ni ku e referèndem en kestion ta kumpli ku kriterianan internashonal. Ku otro palabra: Boneiru ta kore peliger ku e ta hañ'e ku un kos organisá purápurá ku lo pone ku e pueblo di Boneiru no por ehersé su derechi di outodeterminashon na drechi i Boneiru ta kore peliger ku su bon reputashon ta wòrdu dañá.

Nos preokupashon ta legitimá e siguiente preguntanan:



Frakshon di Movimentu di Pueblo Boneriano

Preguntanan por eskrito di frakshon di Movimiento di Pueblo Boneriano konforme artikulo 45 di Reglamentu di òrdu pa Konseho Insular di Boneiru

Pregunta 1: Ki tipo di referèndem Kolegio Ehekutivo a skohe?

Pregunta 2: Kolegio Ehekutivo por manda un 'stappenplan' pa Konseho Insular den kua e ta pone e pasonan ku mester tuma pa logra e referèndem promé ku desèmber?

Pregunta 3: Kolegio Ehekutivo tin pensá pa lanta un komishon di hendenan di bon reputashon pa guia e proseso di referèndum aki? Kolegio Ehekutivo por bisa Konseho Insular ta ken ta e miembronan di e komishon aki? Kolegio Ehekutivo tin un indikashon ki dia e komishon aki mester ta kla ku su promé rekomendashonnan?

Pregunta 4: Kolegio Ehekutivo a manda invitá ekspertonan di Nashonnan Uní pa yuda Boneiru ku formulashon di e pregunta(nan) pa e referèndem i alabes konsehá Boneiru tokante e rekisitonan ku tin mester pa por organisá un referèndum ku ta keda rekonosé internashonalmente?

Pregunta 5: Ki dia e kampaña di informashon pa pueblo di Boneiru ta start i kuantu tempu esaki ta bai tuma? Kolegio Ehekutivo ta tene kuenta ku rekisitonan di Nashonnan Uní riba e parti aki?

Pregunta 6: Ki dia Kolegio Ehekutivo ta manda un proposishon di lei pa Konseho Insular pa hasi posibel ku ta bini un referèndem e aña aki mes (2015)?

Pregunta 7: Ki dia Kolegio Ehekutivo ta manda pa Konseho Insular proposishon di lei pa kambio di presupuesto i pa pone sèn disponibel pa organisá e referèndem?

Pregunta 8: Kolegio Ehekutivo tin un indikashon kaba ta kuantu e referèndem ta bai kosta i a kosto di kua pòst e ta bai?

Pregunta 9: Kon Kolegio Ehekutivo ta bai perkurá i garantisá ku informashon tokante e opshonnan ku lo ser presentá na elektorado pa skohe den e referèndem lo ta obhetivo, no-partidario i sinsero, pa asina pueblo di Boneiru por forma nan opinion tokante e opshonnan kompletamente liber di e preferensha di un òf otro partido.

Konforme artikulo 45 insiso 3 di e Reglamentu di òrdu pa Konseho Insular di Boneiru nos ta deseá di haña e kontestanan por eskrito i mas pronto posibel, en todo kaso dentro di 30 dia despues ku e preguntanan drenta.

Atentamente,

Miembro di Frakshon di Movimentu di Pueblo Boneriano - MPB

Joselito Statia